

Ziczac politic e la neutralitad

La neutralitad svizra è per tschertins sacrosancta – per Sacha Zala betg. L'istoricher perscrutescha cun ses institut ils documents diplomatics da la Svizra. Per trent'onns en quels mintgamai bloccads, lura scroda il secret d'uffizi. Sacha Zala publitgescha lura cun ses team ils pli interessants documents. Sa basand sin sia invista relativescha el l'adurada neutralitad absoluta.

CLAUDIA CADRUVI/FMR

Curt suenter che la Russia attaga l'Ucraina cumenzan discussiuns chalaradas. Duai la Svizra sa participar a las sancziuns cunter la Russia? Duai la Svizra furnir armas a l'Ucraina? Sa cumporta gliez cun la neutralitad?

L'istoricher *Sacha Zala* è director dal Dodis (guarda box). El raquinta d'in document dal 1951 ch'el ha stuì leger pliras giadas fin ch'el ha chapì sia muntada. Il document relativescha la chapientscha d'ina neutralitad rigurusa.

FMR: Tge di è per Vos pli impurtant, Voss anniversari ils 24 da november u ils 3 da schaner?

Sacha Zala: Cun distanza ils 3 da schaner. Jau na festivesch betg uschè gugent mes anniversari quai che mia famiglia na chapescha betg propri.

Ils 3 da schaner publitgescha Voss institut mintgamai ils pli impurtants documents che na sutastattan suenter 30 onns betg pli al secret d'uffizi.

Nus publitgain perfin gia la notg da l'emprim da schaner ils documents ch'ans paran impurtants sin nosa platfurma en l'internet. Ils 3 da schaner, l'emprim di da lavur da l'onn, suonda lura la vernissascha cun il cudesch che cuntogna ina schelta dals 60 documents marcants. Il pli gugent faschess jau questa vernissascha atgnamain era gia l'emprim da schaner.

Vus e Voss collavurats pudais perscrutar ils documents che duain vegnir publitgads suenter 30 onns. Datti in document che Vus essas propi stà stut?

Igl è in protocol d'ina sesida dal Cussegl federal dals 27 da fanadur 1951. Jau hai stuì leger e turnar a leger il protocol in tozzel giadas fin ch'jau hai chapì sia muntada.

È tge è stà uschè spezial vi da quest protocol?

El sa referescha sin l'uschenumnada cunvegna Hotz-Linder tenor ils nums dal diplomat svizzer e dal diplomat american ch'èn stads involvids. Igl è stà ina cunvegna a bucca. Ils Stadis Unids avevan mess sut squitsch la Svizra da sa participar a las sancziuns dals Alliads cunter l'Uniun sovietica. I ha dà ina glista da rauba strategica che na dueva betg pli vegnir furnida impedir l'armament massiv da l'Uniun sovietica. Ils Americans han smanatschà: U che la Svizra sa participescha a las sancziuns u ch'ella vegnia sezza era sancziunada.

E tge ha fatg surstar Vos?

Il Cussegl federal è sa sutmess al reschim da sancziuns dals Alliads. Gliez munta facticamain ch'el ha dà si la neutralitad integrala. Envers anora n'è gliez gea mai vegnì communitgà. Il protocol dal Cussegl federal è formulà uschè diffus, en ina lingua uschè tecnocratica, ch'el zuppenta quasi sia muntada.

Dapi la guerra en l'Ucraina discute-scha la Svizra puspè davart la neutralitad. Tge è Vossa tenuta?

Jau sun in vegl chapitani da l'infantaria da muntogna. Jau sun infinitamain engraziavel che la Svizra na maina naginas guerras offensivas, mabain vul be sa defender. En Svizra datti ozendi probabel be paucs che lessan desister da la neutralitad. Il problem è: Co vegn la neutralitad definida? Qua regia ina terribla confusiuin.



«In privilegi ed in siemi per mintga istoricher», numna Sacha Zala sia incumbensa. Sco director dal Dodis a Berna po el perscrutar cun ses team documents anc secrets.

FOTO KEYSTONE/PETER SCHNEIDER

Director, professor e Puschlavin

Sacha Zala (55) è creschì si a Brusio en ina famiglia da viticulturs. El ha fatg il gimnasi a Zuoz ed ha studegià istorgia, politologia e dretg statal a l'Universitad da Berna e North Carolina en ils Stadis Unids.

Tema da sia dissertaziun è stà «Geschichte unter der Schere der politischen Zensur». Dapi l'onn 2000 lavura l'istoricher per il post da perscrutaziun da documents diplomatics da la Svizra (Dodis). Il 2008 è el daventà director. El instruescha istorgia a l'Universitad a Berna.

En il Grischun è el enconuscent per ses engaschi en la Pro Grigioni Italiano ch'el ha presidià plirs onns. Il 2019 ha el retschavì il premi da cultura dal Grischun per ses engaschi sco perscrutader da la diplomazia, da politica exteriora, da minoritads e da regiuns als cunfins.

Entant che blers istorichers sa nuspeschan da prender posiziun en las medias, è Sacha Zala gugent pront da s'exprimer tar temas che pertutgan ses champs. El po dar pled e fatg currentamain per talian, tudestg, franzos ed englais. (fmr/vi)

Tge è Vossa vista?

La neutralitad vegn bunamain glorifitgada. Il fatg è che la neutralitad ha tegnì ensemen noss pajais suenter l'Emprima Guerra mundiala. La Svizra tudestga simpatisava cun l'imperatur da la Germania, la Romandia cun la Frantscha. Gliez avess bunamain stgarpà da part noss pajais. La neutralitad è da lezzas uras stada il consens minimal per salvar la Svizra. Igl è in mument central per la neutralitad.

Ed ils vegls Confederads?

Per lezs era la neutralitad in bun argument per trametter mercenaris a tuttas partidas da guerra – ina cumplettamain autra chapientscha. I na fa pia nagin senn da sa referir sin la battaglia da Marignano il 1515 en la Lombardia u sin il Congress da Vienna il 1815. La neutralitad da lez temp era ina tut autra.

La Svizra ha starment da furnir armas a l'Ucraina e scumonda perfin ils imports indirects dad armas svizras en l'Ucraina – pervi da la neutralitad. Tge schais Vos sco istoricher?

«La neutralitad vegn bunamain glorifitgada.»

Sacha Zala, istoricher

L'entira debatta dapi l'entschatta da la guerra en l'Ucraina il 2022 è confusa. Tenor il dretg internaziunal, la convenziun da Den Haag, pudessan stadis neutrals exportar armas. Las dispitas per furnir armas a l'Ucraina han da far cun la lescha d'export svizra. Questa lescha ha la Svizra sezza decidì. Ella po era puspè midar questa lescha.

Pertge han ins definì la lescha a moda uschè severa?

I ha dà ils ultims onns in consens tranter pacifists da la sanestra ed ils circuls da la dretga naziunala che giavischan ina neutralitad rigurusa. Gliez ha manà a disposiziuns severas. La lescha d'export dad armas è exemplarica per il ziczac en la politica. Tut tenor constellaziun han ins formulà pli u main rigurus las reglas d'export. Era suenter il Bührl-scandal il 1968 – il concern svizzer aveva furnì armas a la Nigeria malgrà l'embargo – avevan ins decidì reglas severas.

Essas Vos persunter da schlucar la lescha d'export dad armas per pussibilar exports en l'Ucraina?

Dodis publitgescha documents diplomatics

Passa ina milliun documents producescha l'administraziun federala mintg'onn. Suenter trent'onns scada il secret d'uffizi. La publicitad po prender invista. Qua presta il Dodis – il post per documents diplomatics da la Svizra – in servetsch.

Ella perscrutescha ils documents che vegnan dads liber e fa ina tscherna. Mintg'onn publitgescha il Dodis ina schelta da 1500 documents interessants ch'èn gist vegnids dads liber

sin sia plattafurma. En in cudesch cumparan radund sessanta «capo-documents» als quals il Dodis contribuescha ina auta relevanza istorica.

Il cudesch ch'è cumpari l'entschatta da quest onn cuntogna documents dal 1993, per exempel in protocol d'in curt discours tranter l'activist Bruno Manser e cusseglier federal Jean-Pascal Delamuraz. (fmr/vi)

Jau na di betg sch'jau sun pro u contra. Jau di be ch'i n'è betg vair da pretender ch'ins na dastgia betg exportar armas pervia da la neutralitad. La Svizra è in pajais suveran, ella po nizzegiar sias pussaivladads d'export. Igl è ina dumonda puramain politica, betg ina dumonda dal dretg da neutralitad.

Tge schais Vos tar l'iniziativa populara da neutralitad da la PPS che vul scumandar ina entrada en la NATO?

L'iniziativa è inutila. Gia oz n'è in'entrada en la NATO gnanc pussaivla senza ina votaziun dal pievel.

La PPS less però francar la neutralitad en la Constituziun.

I sa tracta d'ina uschenumnada Mogelpackung. La neutralitad è gia fixada en la Constituziun. En sazez less l'iniziativa cuntunt impedir sancziuns ch'èn tut in'otra chaussa. Jau stoss dir, igl è naiv da pensar che la Svizra avess gi il 2022 la minima pussaivladad da betg surpigliar las sancziuns da l'UE e dals Stadis Unids cunter la Russia.

Pertge èsi naiv?

Igl è exact sco il 1951 tar la cunvegna da Hotz-Linder. Sch'il Cussegl federal na fiss lezza giada betg sa sutmess als giavischs dals Alliads, fiss la Svizra sezza vegnida sancziunada. Perquai smirvegl jau da la naivtad e la glorificaziun en blers chaus che pensan che la Svizra pudess pratitgar ina neutralitad totala senza che gliez avess consequenzas massivas.

E tge cartais Vos ch'ils documents tradeschan en trent'onns davart las sesidas dal Cussegl federal che ha discutà las sancziuns cunter la Russia?

En trent'onns vegnan ins a vesair che la Svizra è stada sut squitsch massiv da l'UE e dals Stadis Unids da surpigliar las sancziuns. Il Cussegl federal n'ha gi naginas letgas. Tar il secret da banca ils 2014 èsi stà il medem. Il Cussegl federal aveva l'emprim ditg che la Svizra na tschessia mai. Paucas emnas pli tard è crudà il secret bancar.

La pitschna Svizra n'ha nagina schanza cunter ils gronds?

Fatg è, sch'ils pli impurtants players da la cuminanza internaziunala vulan cuntanscher insatge, na po in singul pajais sco la Svizra, cun ina economia entretschada sin l'entir mund, betg s'opponer. Jau smirvegl adina puspè co ch'ins ha l'impressiuin che la Svizra saja absolutamain suverana. Igl è naiv da pensar ch'ins possia far tge ch'ins vul e da betg vesair quest gigantic squitsch bestial.

Tge fissi da far?

Igl è remartgabel ch'il Cussegl federal n'è mai stà en il stan dad explitgar al pievel en simpels plects: «Tadlai, la situaziun è quella che sche nus na surpiglian betg las sancziuns, lura vegnin nus sezs londervi, punct.» Jau sun segir ch'il pievel chapiss quai. Ma per mantegnair ina apparenta dignitad e suveranità na vul la politica betg admetter quai.

È gliez la difficultad tar la discussiun davart la neutralitad?

Per blers èsi gia eresia sch'jau di che la neutralitad svizra è vegnida inventada. Ella na deriva betg giu da tschiel da Dieu, mabain è in construct. La neutralitad vegn savens discutada a moda dogmatica sco ina religiun. Sin questa basa na pon ins betg pli manar ina discussiun.